

LOCORUM TERRÆ SANCTÆ EXACTISSIMA DESCRIPTIO,

AUCTORE

F. BROCARDO MONACHO.

CAPUT. I.

De Syria, Phœnicia, Palestina & Arabia.



ISTA Terra, quam *Sanctam* vocamus, duodecim tribubus Israël funiculo distributionis in possessionem tradita, post tempus Salomonis in *duo regna* excrevit: unum *regnum Judæ* dicebatur, duas complectens tribus, nempe Judæ & Benjamin: alterum verò *regnum Samariæ* vocabatur, à metropoli *Samariæ*, quæ nunc *Sebaste* nomen habet, reliquas decem continens tribus: utrumque tamen regnum una cum Palæstina pars erat *Syriæ*, non secus quàm *Tuscia*, aut *Lombardia* pars est *Italiæ*: nam Syria, ut reliquæ magnæ nationes, in multas scinditur particulares provincias. Et quidem ea regio, quæ est à Tigride fluvio usque ad Ægyptum, generali vocabulo *Syria* nuncupatur. At ea pars & tractus, qui est inter duos illos insignes fluvios, Euphratem & Tigrim, vocatur apud Hebræos *ארם נהרים* id est, *Syria fluviorum*, quæ Græco vocabulo *Mesopotamia* appellatur, quod media inter aquas contineatur: habetque civitatem insignem & celebrem *Edeßam*, quæ olim *Rages*, nunc autem *Rase* nuncupatur. Deinde est alia pars *Syriæ*, quæ *Cæle* vocatur, incipiens ab Euphrate flumine & desinens in rivum *Valaniæ*, qui fluit sub *castro Valat*, exoneraturque in mare Magnum, seu Mediterraneum, in *villa Balaniæ*, una leuca à dicto castro distante. In hac *Cælesyria* est nobilis civitas *Antiochena*, cum aliis urbibus, *Laodicea*, *Apamia*, & similibus. Rursus est *Syria Phœnicis*, quæ ab Aquilone initium sumit à rivo *Valaniæ*, & extenditur usque ad montem *Carmeli*, ubi locus est, qui hodiè *Castrum peregrinorum* vocatur. In hac multæ sunt civitates, nempe *Tripolis*, *Berytus*, *Sidon*, *Tyrus*, *Acon*, *Capernaum* & aliæ quædam. Habet quoque *Libanum montem* secundum aliquos, in quo thura leguntur. Porro vocatur *Syria Phœnicis* à filio Agenoris, qui *Tyrum* instauravit, & metropolim in ea provincia constituit. Est & alia pars *Syriæ*, quæ *Syria Damasci* appellatur, in qua *Damascus* est metropolis, quæ & *Syria Libanica* à Libano monte vocatur. Post *Syriam Phœnicis* sequitur *Palæstina*, etiam pars *Syriæ*, in tres scissa regiones. Una vocatur *Palæstina* sine ullo additamento, habens *Hierusalem* metropolim, extenditurque usque ad mare Mortuum, & ad desertum *Cadesbarne*. Alia est *Palæstina Cæsareæ*, habens scilicet *Cæsaream* maritimam urbem metropolim, incipiens à castro *Peregrinorum*, & excurrens contra Austrum usque ad *Gazam* civitatem. Tertia vocatur *Palæstina Galilææ*. Vindicat quoque sibi nonnihil Syria de partibus *Arabie*. Nam una est *Arabia*, quæ *Baßtrum* habet metropolim, quæ nunc *Busrit* appellatur, olim autem *Orsa* fuit, cui ab Occidente jungitur *Trachonitidis* regio, atque *Ituræa*, & ab Aquilone *Damascus*,

Y

unde